

հեղինում էր «Թան»-ը, քիչ տեղ էր բռնում և Վիլսընեան ներչնչումը՝ ուղղակի կամ անուղղակի :

Նախագահ Վիլսընի նախաձեռնութեամբ, 1919թ. յունւ. 30-ին Վեհաժողովը վճռեց ազատել Հայաստանը և նշանակել հոգատար (մանդատէր) : Մարտ 20-ին դարձեալ Վիլսընի առաջարկութեամբ Վեհաժողովը որոշեց Մերձաւոր Արևելք ուղարկել Ամերիկայի, Ֆրանսիայի, Անգլիայի և Իտալիայի ներկայացուցիչներին բաղկացած մի յանձնախումբ՝ քննելու համար օսմանեան կայսրութիւնից անջատելիք երկրամասերի վիճակը և ժողովուրդներին կարիքները : Փաստօրէն դնացին միայն Ամերիկայի ներկայացուցիչները՝ Քինգն ու Քրէյնը . միւս կառավարութիւնները ներկայացուցիչ չնշանակեցին : Քինգն ու Քրէյնը հարցաքննութիւն կատարեցին Պոլսում յունիս 10-ից մինչև յուլ. 21 և եկան այն եզրակացութեան, որ նախկին օսմանեան կայսրութիւնից պէտք է կազմել 3 նոր պետութիւն՝ Հայաստան, Թիւրքիա և Պոլիս, որոնցից իւրաքանչիւրը առանձին-առանձին և բոլորը միասին պէտք է յանձնեն մի պետութեան հոգատարութեան (մանդատ) : Մասնաւորապէս դժար էր երևում Հայաստանի հոգատարութիւնը, որի ստանձնումը պայմանաւորում էր նրանով, որ Պոլիսն ու Թիւրքիան էլ դրեն միևնոյն պետութեան հոգատարութեան տակ : Իրենց տեղեկագրում Քինգն ու Քրէյնը առաջարկում էին, որ Հայաստանի, Թիւրքիայի և Պոլսի մանդատը տրւի Ամերիկային :

1919թ. ամառը նախագահ Վիլսընը նոր յանձնախումբ ուղարկեց Առաջաւոր Ասիա՝ քննելու համար մանդատի պայմանները : Հմուտ մասնագէտների բաղմամբ մի առաքելութիւն էր այդ զօրավար Հարբորտի գլխաւորութեամբ : Առաքելութիւնը իր քննական պտոյտը սկսեց Պոլսից, անցաւ Կիլիկիա, Հիւսիսային Սիւրիա, Տիգրանակերտ, Խարբեդք, Սըվազ, Երզնկա, Կարին, Կարս : Ամէն տեղ հարցաքննեց ազգաբնակչութեան ներկայացուցիչներին, յարաբերութեան մէջ մտաւ տեղական իշխանութիւնների հետ, հաւաքեց պատմական, ազգագրական, տնտեսական, քաղաքական, բնաշխարհագրական, մշակութային, ռազմագիտական և այլ կարգի տեղեկութիւններ : Սըվազում զօր. Հարբորտը տեսակցութիւն ունեցաւ Մուստաֆա Քեմալի հետ, որը նոր էր ձեռնարկում «Միլլի» շարժման : Հարբորտի ասելով՝ Քեմալը խնդրել է յայտնել Հայաստանի կառավարութեան, որ այս վերջինը ձեռք քաշէ մեծ պետութիւններից և անմիջապէս համաձայնութեան գայ Թիւրքերի հետ :

Հարբորտի առաքելութիւնը, Կարսից, Կաղզւան—Կողբ—Սուրմալուի ճանապարհով հասաւ Երևան և ջերմ ընդունելութիւն գտաւ կառավարութեան ու ժողովրդի կողմից : Առաջուց արդէն ուղարկւած էին ընդարձակ հարցացուցակներ, և կառավարութիւնը պատրաստել էր պահանջւած նիւթը : Տեղի վրա էլ Հարբորտն ու իր ընկերները կատարեցին մանրակրկիտ քննութիւն և նոյն ջերմութեամբ ճանապարհ դրեցին դէպի Թիֆլիս : Այստեղից անցան Բագու և սեպտեմբերի վերջերին մեկնեցին Փարիզ, որտեղից զօր .